



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 042941 22 Iž**  
**Sarajevo, 31.05.2020. godine**

Sud Bosne i Hercegovine u Sarajevu, u apelacionom upravnom vijeću sastavljenom od sudija, Vesne Trifunović, predsjednika vijeća, Mirsade Džindo i Mirka Božovića, članova vijeća, odlučujući o žalbi Karić Farisa iz S., izjavljenoj protiv odluke Centralne izborne komisije Bosne i Hercegovine, broj: 06-1-07-1-57/22 od 11.05.2022.godine, u pravnoj stvari davanja saglasnosti na Odluku o imenovanju člana Općinske izborne komisije općine Stari Grad Sarajevo, na nejavnoj sjednici održanoj dana, 31.05.2022. godine, donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, data je saglasnost na Rješenje Općinskog vijeća Stari Grad Sarajevo broj: 02-45-316/22 od 28.04.2022.godine, kojim se na dužnost u članstvu Općinske izborne komisije Stari Grad Sarajevo imenuje Dino Smajić, kao član.

Žalitelj je blagovremeno uložio žalbu na navedenu odluku iz razloga povrede pravila postupka te je predložio da se žalba usvoji, pobijano rješenje poništi i vrati na ponovni postupak ili da se raspiše novi izbor za člana izborne komisije.

U žalbi ističe da istu ulaže zbog transparentnosti i zakonitosti postupka, narušavanja člana 2.14 stav (1) i člana 2.15 stav (2) Izbornog zakona BiH. Dalje navodi da zbog isteka mandata člana izborne komisije sa datumom 24.02.2022. godine, na sjednici održanoj 30.12.2021. godine Općinsko vijeće Stari Grad Sarajevo je usvojilo prijedlog Odluke o objavljivanju oglasa za izbor člana Općinske izborne komisije, a Javni oglas je objavljen dana 12.01.2022. godine. Dalje navodi da kao kandidat nije imao informacije o ostvarenim rezultatima, bodovnom statusu, odnosno glasanju članova komisije, te je samim tim narušena transparentnost glasanja. Takođe navodi je postupak o imenovanju startao istekom mandata člana izborne komisije 24.02.2022. godine, a daje rješenje o imenovanju i saglasnosti dostavljeno 11.05.2022. godine, čime je narušen člana 2.15 Izbornog zakona BiH. Isto tako navodi da trenutni sastav Opštinske izborne komisije Stari Grad Sarajevo nije u skladu sa članom 2.14 Izbornog zakona BiH, odnosno daje Centralna izborna komisija BiH propustila izvršiti provjeru zastupljenosti konstitutivnih naroda, kao i zastupljenost polova.

U izjašnjenju na žalbu CIK BiH je predložio da se ista odbije kao neosnovana iz razloga što je pobijano rješenje doneseno na pravilan i potpun način u skladu sa odredbama Izbornog zakona BiH.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije Bosne i Hercegovine kojom je data saglasnost na Rješenje Općinskog vijeća Stari Grad Sarajevo broj: 02-45-316/22 od 28.04.2022.godine, kojim je na dužnost u članstvu Općinske izborne komisije Stari Grad Sarajevo imenovan Dino Smajić, član.

Naime, iz stanja spisa proizilazi da je Općinsko vijeće Stari Grad Sarajevo je aktom broj: 02-45-206/22 od 02.03.2022. godine, zatražilo od Centralne izborne komisije Bosne i Hercegovine saglasnost na Rješenje broj: 02-45-135/22 od 24.02.2022.godine, kojim se Meliha Olovčić razrješava dužnosti u članstvu Opštinske izborne komisije Stari Grad Sarajevo, zbog isteka mandata.

Nadalje, Općinsko vijeće Stari Grad Sarajevo je aktom broj: 02-45-320/22 od 29.04.2022. godine, zatražilo od Centralne izborne komisije Bosne i Hercegovine saglasnost na Rješenje broj: 02-45- 316/22 od 28.04.2022. godine, kojim se Dino Smajić imenuje na dužnost u članstvu Općinske izborne komisije Stari Grad Sarajevo.

Centralna izborna komisija BiH je, na osnovu predmetne dokumentacije na svojoj 18. sjednici, održanoj dana 11.05.2022. godine, Rješenjem broj: 06-1-07-1-57/22 od 11.05.2022. godine dala saglasnost Rješenje Općinskog vijeća Stari Grad Sarajevo broj: 02-45-135/22 od 24.02.2022.godine, kojim se dužnosti u članstvu Općinske izborne komisije Stari Grad Sarajevo, zbog isteka mandata, razrješava Meliha Olovčić, članica.

Na istoj sjednici, Centralna izborna komisija BiH je Rješenjem broj: 06-1-07-1-57/22 od 11.05.2022.godine, dala saglasnost na Rješenje Općinskog vijeća Stari Grad Sarajevo broj: 02-45- 316/22 od 28.04.2022. godine, kojim se na dužnost u članstvu Općinske izborne komisije Stari Grad Sarajevo imenuje Dino Smajić, član.

Iz navedenog proizilazi da je Centralna izborna komisija Bosne i Hercegovine razmatrajući dokumentaciju koju je dostavilo Općinsko vijeće Stari Grad Sarajevo, pravilno utvrdila da je Općinsko vijeće Stari Grad Sarajevo postupilo u skladu sa članom 2.12 stav (5) Izbornog zakona Bosne i Hercegovine, odnosno da imenovani u članstvo Općinske izborne komisije Stari Grad Sarajevo ispunjava sve uslove propisane Izbornim zakonom Bosne i Hercegovine i Uputstvom o utvrđivanju kvalifikacija, broju, imenovanju, obuci i razrješenju članova izborne komisije osnovne izborne jedinice u Bosni i Hercegovini ("Službeni glasnik BiH", br. 67/21, 73/21, 1/22 i 13/22) (u daljem tekstu:Uputstvo).

U odnosu na navode žalitelja da kao kandidat nije imao informacije o ostvarenim rezultatima, bodovnom statusu, odnosno glasanju članova komisije, te da je samim tim narušena transparentnost glasanja valja istaći da je odredbom člana 13. stav (2) Uputstva propisano da Centralna izborna komisija Bosne i Hercegovine daje pisanu saglasnost na odluku o imenovanju i razrješenju članova izborne komisije, ukoliko su ispoštovane procedure iz člana 7. , 8., 9., 10. i 13. stav (1) ovog uputstva i ukoliko izabrani kandidati ispunjavaju propisane uslove i tu saglasnost dostavlja nadležnom organu. Stoga je Centralna izborna komisija Bosne i Hercegovine utvrdila daje rješenje Općinskog vijeća Stari Grad Sarajevo o

imenovanju člana općinske izborne komisije Stari Grad Sarajevo zakonito, obzirom da imenovani član Dino Smajić ispunjava sve opšte i posebne uslove propisane Izbornim zakonom Bosne i Hercegovine i Uputstvom.

Da su neosnovani i irelevantni navodi podnosioca žalbe „da je narušen član 2.15 Izbornog zakona BiH, obzirom da je postupak o imenovanju startao istekom mandata članova izborne komisije 24.02.2022.godine, a da je rješenje o imenovanju i saglasnosti Centralne izborne komisije BiH dostavljeno 11.05.2022. godine, potvrđuje i činjenica da je u prethodnom postupku, Općinsko vijeće Stari Grad Sarajevo aktom broj: 02-45-206/22 od 02.03.2022. godine, zatražilo od Centralne izborne komisije Bosne i Hercegovine saglasnost na Rješenje broj: 02-45-134/22 od 24.02.2022. godine, kojim se Selma Ribić imenuje na dužnost u članstvu Općinske izborne komisije Stari Grad Sarajevo.

S obzirom da konkursna komisija nije izvršila bodovanje u skladu sa odredbom člana 10. stav (6) Uputstva o utvrđivanju kvalifikacija, broju, imenovanju, obuci i razrješenju članova izborne komisije osnovne izborne jedinice u Bosni i Hercegovini (“Službeni glasnik BiH”, br. 67/21, 73/21 i 1/22)(u daljem tekstu: Uputstvo), Centralna izborna komisija BiH je aktom broj: 06-1-07-1-57/22 od 14.03.2022. godine dostavila Općinskom vijeću Stari Grad Sarajevo zahtjev za usklađivanje bodovanja sa odredbom člana 10. stav (6) Uputstva.

Konkursna komisija je postupila u skladu sa zahtjevom Centralne izborne komisije BiH i dostavila Općinskom vijeću Stari Grad Sarajevo Izveštaj broj: 01-45-192/22 od 21.03.2022. godine i rang- listu, u skladu sa članom 10. stav (10) Uputstva. Na korigovanoj rang-listi, Selma Ribić je ponovo bila prvorangirana kandidatkinja, ali se ni redosljed preostala četiri kandidata na rang-listi nije promijenio.

Međutim, Općinsko vijeće Stari Grad Sarajevo na svojoj 14. sjednici, održanoj 31.03.2022. godine nije usvojilo prijedlog Rješenja o imenovanju člana Općinske izborne komisije Stari Grad Sarajevo, jer prijedlog za imenovanje provorangirane Selme Ribić nije dobio natpolovičnu većinu. Dakle, Općinsko vijeće Stari Grad Sarajevo nije dalo obrazloženje, kako je propisano članom 10. stav (11) Uputstva, nakon čega je Selma Ribić obavijestila 01.04.2022. godine Opštinsko vijeće Stari Grad Sarajevo da povlači svoju prijavu na javni oglas za imenovanje člana Općinske izborne komisije Stari Grad Sarajevo.

Centralna izborna komisija BiH je aktom broj: 06-1-07-1-57/22 od 14.04.2022. godine dostavila Općinskom vijeću Stari Grad Sarajevo zahtjev za obrazloženje, kako je propisano članom 10. stav (11) Uputstva, da se izjasni u vezi sa povlačenjem prijave Selme Ribić, te ukoliko udovolji zahtjevu Selme Ribić, stavi van snage Rješenje broj: 02-45-134/22 od 24.02.2022. godine i imenuje narednog kandidata sa rang-liste.

Nadalje, Općinsko vijeće Stari Grad Sarajevo je postupilo u skladu sa aktom Centralne izborne komisije BiH i aktom broj: 02-45-320/22 od 29.04.2022. godine obavijestilo da prilikom odlučivanja 31.03.2022. godine o imenovanju Selme Ribić nije dalo obrazloženje o odstupanju od rang-liste, izjasnilo se o povlačenju prijave Selme Ribić (prihvatilo obavijest o povlačenju prijave), stavilo van snage Rješenje broj:02-45-134/22 od 24.02.2022. godine i imenovalo Dinu Smajića, drugorangiranog kandidata, u članstvo Općinske izborne komisije Stari Grad Sarajevo.

Dakle, imajući u vidu postupak koji je prethodio donošenju Rješenja Centralne izborne

komisije BiH, broj: 06-1-07-1-57/22 od 11.05.2022. godine proizilazi da ni u kom slučaju nije narušena odredba člana 2.15 Izbornog zakona BiH.

*U vezi navoda podnosioca žalbe da trenutni sastav Općinske izborne komisije Stari Grad Sarajevo nije u skladu sa članom 2.14 Izbornog zakona BiH, odnosno da je Centralna izborna komisija BiH propustila izvršiti provjeru zastupljenosti konstitutivnih naroda, kao i zastupljenost polova valja istaći da su isti neosnovani, jer iz stanja spisa proizilazi da se u sastavu Općinske izborne komisije Stari Grad nalazi i jedan člana iz reda Srba (Nada Dimitrijević).*

Odredbom člana 2.14 stav (1) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05 52/05, 65/05, 77/05, 11/06 24/06, 32/07, 37/08, 32/10, 18/13, 7/14, 31/16 i 41/21) je propisano da je sastav izborne komisije multietničan, tako da odražava zastupljenost konstitutivnih naroda, uključujući i ostale, u izbornoj jedinici za koju se organ nadležan za provođenje izbora osniva, vodeći računa o posljednjem popisu stanovništva provedenom na državnom nivou. U sastavu izborne komisije nastojati će se osigurati zastupljenost polova u skladu sa Zakonom o ravnopravnosti polova u BiH, osim ako se izborna komisija sastoji od tri člana kada ravnopravna zastupljenost postoji u slučaju kada je jedan od polova zastupljen sa 1/3 od ukupnog broja članova. Prema rezultatima posljednjeg popisa stanovništva u Bosni i Hercegovini struktura stanovništva u opštini Stari Grad Sarajevo je sljedeća:

| <b>UKUPNO<br/>STANOVNIKA</b> | <b>Bošnjaci</b> |        | <b>Hrvati</b> |       | <b>Srbi</b> |       | <b>Ostali</b> |       |
|------------------------------|-----------------|--------|---------------|-------|-------------|-------|---------------|-------|
| <b>36.976</b>                | 32.794          | 88,69% | 685           | 1,85% | 467         | 1,26% | 2.434         | 6,58% |

Nisu se izjasnili - 547 (1,48%) Bez odgovora - 49 (0,13%)

Imajući u vidu naprijed navedeno i činjenicu da iz rang liste uspješnih kandidata proizilazi da je i sam podnositelj žalbe iz reda bošnjačkog naroda, te da njegovim imenovanjem sastav Općinske izborne komisije Stari Grad Sarajevo bio ostao nepromjenjen u smislu zastupljenosti konstitutivnih naroda uključujući i ostale.

Obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
SUDIJA  
Vesna Trifunović**